

Broj: UP1-06-13-1-57-7/20
Mostar, 28.01.2021. godine

Na osnovu člana 21., člana 37., člana 42., člana 84., člana 85. stav (2) i člana 87. stav (1) i stav (2) Zakona o električnoj energiji u Federaciji Bosne i Hercegovine („Službene novine Federacije BiH“ broj 66/13, 94/15 i 54/19), člana 20. stav (2) i člana 27. Zakona o korištenju obnovljivih izvora energije i efikasne kogeneracije („Službene novine Federacije BiH“ broj 70/13 i 5/14), člana 200. Zakona o upravnom postupku („Službene novine Federacije BiH“ broj 2/98 i 48/99), člana 20. stav (1) i člana 23. stav (1) Statuta Regulatorne komisije za energiju u Federaciji Bosne i Hercegovine („Službene novine Federacije BiH“ broj 24/14 i 91/15), člana 8. stav (1), člana 32. stav (4) i člana 42. stav (1) Poslovnika o radu Regulatorne komisije za energiju u Federaciji Bosne i Hercegovine („Službene novine Federacije BiH“ broj 29/14, 31/16 i 84/19), člana 78. Pravilnika o javnim raspravama i rješavanju zahtjeva, sporova i žalbi („Službene novine Federacije BiH“ broj 57/12, 71/14 i 31/16), člana 19. stav (1) i stav (3) Pravilnika za izdavanje dozvola („Službene novine Federacije BiH“ broj 2/17 i 39/20) i člana 16. stav (1) tačka a) i stav (2) Pravilnika o sticanju statusa kvalifikovanog proizvođača električne energije („Službene novine Federacije BiH“ broj 53/14), postupajući po Zahtjevu za izdavanje dozvole za rad za proizvodnju električne energije u mikro-postrojenju OIE broj UP1-06-13-1-57/20 od 30.06.2020. godine, podnosioca zahtjeva „ECCO ENERGY“, vl. Vlatko Malić, Tasovčići bb, Čapljina, Regulatorna komisija za energiju u Federaciji Bosne i Hercegovine – FERK je 28.01.2021. godine na II redovnoj sjednici donijela sljedeće

RJEŠENJE

1. Odbija se Zahtjev za izdavanje dozvole za rad za proizvodnju električne energije u mikro-postrojenju OIE broj UP1-06-13-1-57/20 od 30.06.2020. godine podnosioca „ECCO ENERGY“, vl. Vlatko Malić iz Čapljine.
2. Odbija se Zahtjev za sticanje statusa kvalifikovanog proizvođača podnosioca „ECCO ENERGY“, vl. Vlatko Malić iz Čapljine, koji je sastavni dio zahtjeva iz tačke 1. ovog rješenja.
3. Ovo rješenje je konačno, te se objavljuje na oglasnoj tabli i internet stranici FERK-a, a dispozitiv ovog rješenja u „Službenim novinama Federacije BiH“.

Obrazloženje

Dana 30.06.2020. godine FERK je pod brojem UP1-06-13-1-57/20 primio Zahtjev za izdavanje dozvole za rad proizvodnju električne energije u mikro-postrojenju OIE podnosioca zahtjeva „ECCO ENERGY“, vl. Vlatko Malić iz Čapljine.

Prilikom pregleda potpunosti podnesenog zahtjeva, u skladu sa članom 9. Pravilnika o javnim raspravama i rješavanju zahtjeva, sporova i žalbi, FERK je utvrdio da podneseni zahtjev nije potpun u smislu člana 12. Pravilnika za izdavanje dozvola. Zbog navedenog, FERK je postupajući u skladu sa članom 10. Pravilnika o javnim raspravama i rješavanju zahtjeva, sporova i žalbi uputio podnosiocu zahtjeva Obavještenje o nedostacima podnesenog Zahtjeva za izdavanje dozvole za rad za proizvodnju električne energije u mikro-postrojenju OIE broj UP1-06-13-1-57-

01/20 od 17.07.2020. godine, te ga istovremeno uputio na odredbe člana 9. stav (3) i stav (6), člana 12. stav (1), člana 20. i člana 21. Pravilnika za izdavanje dozvola, te člana 9. stav (1) i stav (4) Pravilnika o sticanju statusa kvalifikovanog proizvođača električne energije. Naime, članom 9. stav (3) Pravilnika za izdavanje dozvola propisano je da popunjen obrazac zahtjeva za izdavanje dozvole za rad, odnosno obrazac zahtjeva za izdavanje prethodne saglasnosti sa potpunom pratećom dokumentacijom treba biti ovjeren i potpisan od podnosioca, odnosno njegovog zakonskog zastupnika ili ovlaštenog opunomoćenika, dok je stavom (6) istog člana propisano da se prateća dokumentacija prilaže u originalu ili ovjereoju kopiji, s tim da ne smije biti starija od 60 dana. Članom 12. stav (1) Pravilnika za izdavanje dozvola propisano je da je zahtjev potpun kada su uz zahtjev podneseni svi traženi dokumenti i uplaćena jednokratna naknada za obradu zahtjeva, dok su članom 20. navedenog pravilnika taksativno navedeni potrebni dokumenti koji se obavezno prilažu uz zahtjeve za izdavanje dozvola za obavljanje elektroprivrednih djelatnosti, a članom 21. istog pravilnika propisani i dodatni dokumenti koji se obavezno prilažu uz zahtjev za izdavanje dozvole za rad proizvodnju električne energije. Članom 9. stav (1) Pravilnika o sticanju statusa kvalifikovanog proizvođača električne energije propisano je da se postupak sticanja statusa kvalifikovanog proizvođača električne energije pokreće na zahtjev podnosioca, dok je stavom (4) istog člana propisano da je uz zahtjev za sticanje statusa kvalifikovanog proizvođača, podnesen u skladu sa tim članom pravilnika, potrebno priložiti dokumentaciju kojom se dokazuje da su ispunjeni uslovi iz člana 6. i člana 8. tog pravilnika. FERK je podnosiocu zahtjeva odredio rok od osam dana radi otklanjanja uočenih nedostataka navedenih u obavještenju, te je upozoren da će, u slučaju da ne otkloni nedostatke u datom roku, FERK smatrati da zahtjev nije ni podnesen.

Postupajući po obavještenju, podnosilac zahtjeva je dostavio dopis primljen u FERK 27.07.2020. godine pod brojem UP1-06-13-1-57-02/20, dopis primljen u FERK 26.08.2020. godine pod brojem UP1-06-13-1-57-03/20, dopis primljen u FERK 09.10.2020. godine pod brojem UP1-06-13-1-57-4/20 i dopis primljen u FERK 26.10.2020. godine pod brojem UP1-06-13-1-57-5/20, uz koje je dostavio traženu dokumentaciju i obrazloženja.

Podnosilac zahtjeva je uz svoj Zahtjev za izdavanje dozvole za rad za proizvodnju električne energije u mikro-postrojenju OIE dostavio Rješenje Up/I-broj: 04-19-430/20-3 od 25.06.2020. godine, koje je izdala Služba prostornog uređenja i graditeljstva Grada Čapljina. Ovim rješenjem je utvrđeno da se odobrava upotreba mikro fotonaponske solarne elektrane „ECCO ENERGY 2“, na krovu postojećeg poslovnog objekta u Tasovčićima, na parcelama označenim kao k.č. broj 1332/14 i 1332/26 K.O. Tasovčići, za koje radove je investitor obrt „ECCO ENERGY“ vl. Vlatko Malić Tasovčići – Čapljina. Također dostavljen je i Zemljišnoknjižni izvadak Zemljišnoknjižnog ureda Opštinskog suda u Čapljini od 30.06.2020. godine za k.č. br. 1332/14 K.O. Tasovčići upisanu u zemljišnoknjižni uložak broj 408, te Zemljišnoknjižni izvadak Zemljišnoknjižnog ureda Općinskog suda u Čapljini od 30.06.2020. godine za k.č. br. 1332/26 K.O. Tasovčići upisanu u zemljišnoknjižni uložak broj 415, iz kojih je vidljivo da je vlasnik navedenih nekretnina sa udjelom 1/1 podnosilac zahtjeva. Dostavljena je i Kopija katastarskog plana UR broj 06-26-4684/2020-2 od 23.07.2019. godine Službe geodetskih i imovinsko-pravnih poslova Grada Čapljina za k.č. broj 1332/14, te Kopija katastarskog plana UR broj 06-26-4684/2020-3 od 23.07.2019. godine Službe geodetskih i imovinsko-pravnih poslova Grada Čapljina za k.č. broj 1332/26, iz kojih je vidljivo da je posjednik tih nekretnina sa udjelom 1/1 podnosilac zahtjeva. Osim toga, dostavljeno je i Uvjerenje broj 06-26-6647/20-2 od 23.10.2020. godine Službe geodetskih i imovinsko-pravnih poslova Grada Čapljina, kojim se potvrđuje da se na nekretninama označenim kao k.č. 1332/14 i k.č. 1332/26 obje K.O. Tasovčići nalaze dva odvojena objekta (hala i poslovni objekat – skladište).

Iz navedene dokumentacije vidljivo je da se radi o izgradnji proizvodnog objekta solarne fotonaponske elektrane „ECCO ENERGY 2“, koja se jednim dijelom nalazi na objektu na kojem je već izgrađen i priključen proizvodni objekat „ECCO ENERGY 1“, kao mikro-postrojenje OIE,

te za koji je FERK već podnosiocu zahtjeva izdao Dozvolu za rad za proizvodnju električne energije u mikro-postrojenju OIE broj UP1-06-13-1-56/20 Rješenjem broj UP1-06-13-1-56-7/20 od 23.11.2020. godine. Naime, u postupku izdavanja te Dozvole za rad za proizvodnju električne energije u mikro-postrojenju OIE podnosilac zahtjeva je dostavio Rješenje broj Up/I-broj: 04-19-429/20-3 od 25.06.2020. godine, koje je izdala Služba prostornog uređenja i graditeljstva Grada Čapljina. Tim rješenjem je utvrđeno da se odobrava upotreba mikro fotonaponske solarne elektrane „ECCO ENERGY 1“, na krovu postojećeg poslovnog objekta u Tasovčićima, na parceli označenoj kao k.č. broj 1332/14 K.O. Tasovčići, za koje radove je investitor obrt „ECCO ENERGY“ vl. Vlatko Malić, Tasovčići – Čapljina. Na osnovu uvida u cjelokupnu dokumentaciju, a posebno u Rješenje Up/I-broj: 04-19-430/20-3 od 25.06.2020. godine i Rješenje Up/I-broj: 04-19-429/20-3 od 25.06.2020. godine, jasno je da je solarna fotonaponska elektrana „ECCO ENERGY 2“ izgrađena jednim dijelom na objektu na parceli označenoj kao k.č. broj 1332/14 K.O. Tasovčići na kojem je već izgrađen i priključen proizvodni objekat „ECCO ENERGY 1“.

Izgradnjom i priključenjem proizvodnog objekta „ECCO ENERGY 1“ kao mikro-postrojenja OIE, na postojećoj krovnoj konstrukciji već izgrađenog objekta na parceli označenoj kao k.č. broj 1332/14 K.O. Tasovčići, podnosilac zahtjeva je iskoristio mogućnost dobivanja dozvole za rad za proizvodnju električne energije u mikro-postrojenju OIE, pa takva mogućnost ne postoji za proizvodni objekat „ECCO ENERGY 2“ na istom objektu, obzirom da je članom 5. stav (4) Pravilnika za mikro-postrojenja obnovljivih izvora energije („Službene novine Federacije BiH“ broj 50/14 i 39/20) propisano da je na postojećem objektu vlasnika mikro-postrojenja OIE, bez obzira na broj priključaka i broj mjernih mjesta, moguće priključiti samo jedno mikro-postrojenje OIE u skladu sa stavom (3) tog člana.

U vezi sa navedenim, prilikom donošenja ovog rješenja, FERK je imao u vidu odredbu člana 27. stav (1) Zakona o korištenju obnovljivih izvora energije i efikasne kogeneracije, kojom je propisano da su vlasnici mikro-postrojenja OIE iz člana 3. stav (1) tačka r) fizička ili pravna lica, koja moraju biti **krajnji kupci** električne energije od jednog od snabdjevača iz Federacije Bosne i Hercegovine. Imao je u vidu i odredbu člana 27. stav (3) tog zakona, kojom je propisano da mikro-postrojenje OIE mora biti locirano **u okolini ili u sklopu postojećeg objekta** koji već posjeduje **brojilo** električne energije, a njegovo priključenje treba izvesti u tački **postojećeg mjerenja** ugradnjom posebnog brojila kojim bi se posebno registrovala proizvodnja mikro-postrojenja OIE. Dakle, iz ovih odredbi proizilazi da se izgradnja i rad mikro-postrojenja OIE veže **za postojećeg krajnjeg kupca električne energije**. Kroz ove odredbe zakon je posebno definisao mikro-postrojenje OIE da bi se potaknuli postojeći krajnji kupci, da izgrade i stave u pogon mikro-postrojenje OIE, te da krajnji kupac na takav način ostvari poseban podsticaj u smislu otkupa proizvedene električne energije po garantovanim otkupnim cijenama, koji Zakon predviđa. U tom smislu zakon ne predviđa da jedan kupac električne energije preko jednog objekta izgradi i stavi u pogon veći broj mikro-postrojenja OIE, te time na višestruki način ostvari podsticaj u vidu otkupa električne energije po garantovanim otkupnim cijenama za svako mikro-postrojenje OIE posebno, tim više što se pravo na otkup električne energije iz mikro-postrojenja OIE ostvaruje na osnovu samog Zakona, što nije slučaj za ostale proizvodne objekte koji nisu mikro-postrojenja OIE u smislu odredbe člana 27. ovog Zakona.

Dalje, isto je dodatno precizirano članom 5. stav (4) Pravilnika za mikro-postrojenja obnovljivih izvora energije, kojom je propisano da je na postojeći objekt vlasnika mikro-postrojenja OIE, bez obzira na broj priključaka i broj mjernih mjesta, moguće priključiti samo jedno mikro-postrojenje OIE, uz poštivanje svih ostalih uslova koje mikro-postrojenje OIE mora ispunjavati u skladu sa članom 27. Zakona o korištenju obnovljivih izvora energije i efikasne kogeneracije.

Na osnovu svega navedenog, jasno je da podnosilac zahtjeva ne ispunjava uslov iz člana 25. stav (2) tačka a) Pravilnika za izdavanje dozvola, u skladu sa kojom se dozvola za rad za proizvodnju električne energije u mikro-postrojenju OIE izdaje podnosiocu zahtjeva, koji pored kriterija definisanih stavom (1) tog člana, osim tačke b) ako se radi o fizičkom licu, dokaže i to kako je na postojećem objektu ili njegovoj okolini izgrađeno samo jedno mikro-postrojenje OIE, za koje se podnosi zahtjev za izdavanje dozvole za rad za proizvodnju električne energije u mikro-postrojenju OIE.

Na osnovu naprijed navedenog, FERK je ocijenio da je potrebno u skladu sa članom 200. Zakona o upravnom postupku, odnosno članom 19. stav (1) Pravilnika za izdavanje dozvola, odbiti Zahtjev za izdavanje dozvole za rad za proizvodnju električne energije u mikro-postrojenju OIE broj UP1-06-13-1-57/20 od 30.06.2020. godine podnosioca zahtjeva „ECCO ENERGY“, vl. Vlatko Malić iz Čapljine, a kako je sastavni dio tog zahtjeva i Zahtjev za sticanje statusa kvalifikovanog proizvođača, slijedom istog odbiti i taj zahtjev u skladu sa članom 16. stav (1) tačka a) Pravilnika o sticanju statusa kvalifikovanog proizvođača električne energije, budući da status kvalifikovanog proizvođača može steći samo proizvođač električne energije, dakle elektroenergetski subjekt koji je dobio dozvolu za rad u proizvodnom objektu za koji se traži navedeni status.

Na osnovu navedenog, odlučeno je kao u dispozitivu ovog rješenja.

POUKA O PRAVNOM LIJEKU:

Protiv ovog rješenja podnosilac zahtjeva može tužbom pokrenuti upravni spor kod Kantonalnog/Županijskog suda u Mostaru u roku od 30 dana od dana primitka rješenja. Tužba se predaje sudu direktno ili mu se šalje poštom preporučeno. Tužba se može izjaviti i na zapisnik kod navedenog suda ili bilo kojeg drugog suda.

PREDSJEDNIK FERK-a
Jasmin Bešo

DOSTAVITI:

- „ECCO ENERGY“, vl. Vlatko Malić, iz Čapljine (poštom preporučeno uz dostavnicu)
- Sektoru za tehničke poslove i licence